

Tibas enstagl dad alumbards

Expo 2015 a Milaun

■ (cp) Il 2015 è a Milaun ina exposiziun mundiala nua ch'ils organisaturs quintan cun circa 20 milliuns visitaders. Ina fiera mundiala davant las portas da la Svizra. Tenor Hans Peter Danuser in gronda schanza da far reclama per la Svizra, ed el ha gia ina idea co quai pudess schabegiar. 500 sunatibas ord l'entira Svizra sunan trais tocs amez la citad da Milaun. Entaifer in di duain ils sunatibas far il viadi cun meds publics a Milaun, sunar e puspè turnar enavos en Svizra.

Per Hans Peter Danuser ha quella idea plirs messadis, pliras varts ch'ins po preschentar als visitaders internaziunals. 500 sunatibas perquai che avant 500

onns ha giu lieu la battaglia da Marignano. La battaglia che vala per blers sco punct da partenza da la neutralitad svizra. La sfida dal transport da tut quels sunatibas po mo gartegiar cun il sistem da transport public svizzer, in sistem effizient ed ecologic, unic en l'Europa. E la finala vala la tiba sco instrument svizzer tipic ed autentic.

L'idea co far reclama è skizzada. Emprimas reacziuns da Berna, dal chantun e da pussaivels partenaris èn positivs. Il proxim pass è tenor Hans Peter Danuser in emprima seduta mez settember cun il coc dal comité d'organisaziun per concretisar l'idea e definir incumbensas sco er partenaris.



A l'Expo 2015 duain 500 sunatibas sa preschentar en la citad da Milaun.